

## Loron Mundiál Populasaun 2009

11 Jullu 2009

Excelências  
Distintu Konvidadu  
Reprezentante hosi Ajénsia ONU iha Timor-Leste  
Señoras no Señores,

**H**au haksolok tebes ohin loron atu loke selebrasaun bá eventu ida ne'e hodi selebra Aniversáriu Loron Mundial Populasaun nian bá dala ruanulu. Loron Mundiál bá Populasaun hahú iha tinan 1989 liu hosi deklarasaun ne'ebé hasai hosi Assembleia Jerál ONU nudar oportunidade ida atu hasae ema nia konsiénsia kona-ba issu populasaun no nia relasaun bá dezvoltamentu. Asuntu kresimentu populasaun sai hanesan asuntu importante ida no mós hanesan dezafíu bo'ot ida bá dezvoltamentu sosiál no ekonómiku iha Timor-Leste ne'ebé ohin loron iha taxa ema moris a'as liu iha mundu.

Taxa ema moris ne'ebé a'as tebes ne'e fó impaktu bo'ot direktamente bá fetu sira tanba ida ne'e bele hamenus oportunidade bá fetu sira atu hetan igualdade iha edukasaun, bele hamenus sira nia partisipasaun iha servisu públiku no privadu. Ida ne'e laos deit preokupasaun ida bá fetu sira maibé fó mós desvantajen bá família, comunidade ho sociedade tomak.

Nune'e mós, iha buat barak mak ita hatene kona-ba fetu sira. Ita hatene katak fetu sira mak nuudar aliserse família nian tanba sira mak hanorin, hakiak no fó suporta bá ita nia jersaun futuru. Ita hatene katak fetu sira la hetan representasaun di'ak iha edukasaun sekundária no mós iha universidade, ita hatene katak fetu sira mak halao servisu doméstika barak liu ne'ebé la hetan rekoñesimentu maibé buat ida importante liu maka **Fetu sira maka hanesan ajénte ekonómiku ne'ebé investe sira nia rendimentu hodi hakiak sira nia oan sira hodi hetan saúde di'ak no hetan edukasaun di'ak.**

Ekonomía ne'ebé di'ak sei fó importánsia bá igualdade jéneru, tanbá bainhira ajuda fetu sira hodi hetan rendimentu maka ajuda mós mantén labarik fetu sira tuir eskola nafatin no mós garante iha aihan iha nafatin iha família nia meja leten. Tanbá ne'e, ita iha ne'e ohin loron atu rekoñese no promove tema bá eventu ida ne'e katak **Investe iha Fetu mak dalan ida di'ak.**

Tema bá tinan ida ne'e pertinente tebes ho krize finansial globál ne'ebé ema ida seidauk hatene oinsa krize globál nian efeito tomak. Saida mak ita hatene lolos katak fetu ho labarik sira iha nasaun foin dezvoltavidu sira mak sei hetan impaktu bo'ot hosi krize ida ne'e.

Saida mak ita bele halo atu halakon impaktu hosi krize ekonomika ida ne'e iha Timor-Leste? Primeiru, liu hosi rekoñese fetu nia knaar hafoin ita bele promove no investe bá aliserse sira bá ita nia família, uma no comunidade nian tanba bainhira ita hasae kbiit fetu ida, maka ita mós reforsa ona família ida. Hosi família ne'e ita reforsa mós comunidade ida no ho ida ne'e deit maka ita bele halo mudansa iha mundu.

Ho hanoin bá mensajen ida ne'e maka hau ho laran haksolok hakarak fó honra bá esforsu ne'ebé UNFPA ho nia parseriu implementadór sira hanesan Sekretariu Estadu ba Promosaun Igualdade, Diresaun Nasionál Estatística, Ministériu Saúde ho Ministériu Ekonomía no Dezvoltamentu. Ministériu ida-idak hamutuk ho projetu ida-idak UNFPA nian servisu hamutuk atu hamenus pobreza, fó asisténsia reprodutiva no saúde inan nian barak liu, halo monitorizasaun no mós responde bá *trend* no estatística populasaun nian no ikus liu atu hadia moris no igualdade bá fetu sira nia moris.

Ne'e duni, asuntu hasae fetu sira nia kbiit ne'e hanesan asuntu sentral ida báinhira atu hetan objetívu hirak ne'e, ne'e duni ita labele eksklui sira husi eliminaun bá pobreza no dezvoltamentu bá moris labarik mane, labarik fetu, fetu no mane Timor-oan sira.

Importante atu ita hatene katak dezeniu ne'ebé hau deskreve kona-ba fetu sira iha Timor-Leste

labele haré hanesan dezeńu ida ne'ebé la hatudu esperansa maibé tenke haré hanesan dezeńu ida ne'ebé atu hatudu no fó valór katak feto sira iha abilidade, talentu, matenek no iha rekursu ne'ebé bo'ot atu kontribui bá nasaun ida ne'e. Hahú kedas husi prosesu hari'i nasaun ne'e, feto sira marka ona sira nia ezisténsia ho sira nia representante 25% iha Parlamentu.

Nune'e mós, iha feto 25% resin mak servisu iha setór públiku no iha ona polítika balun husi Ministériu Ekonomía ho Dezenvolvimentu atu hasae nafatin númeru ida ne'e. Ne'e duni importante rekoñese servisu todan no dedikasaun ne'ebé halao hosi Sekretaria Estadu ba Promosaun Igualdade hodi fó asesoría, monitorizasaun ho advokasia nafatin kona-ba dezenvolvimentu no inkorporasaun perspetiva jéneru bá polítika sosiál no ekonómiku oin-oin tuir Prioridade Nasionál ne'ebé hatur ona dezenvolvimentu jéneru hanesan prioridade importante ida.

Governu Timor-Leste iha komitmentu atu garante igualdade jéneru no hatur ona kadru polítika ruma ne'ebé kondusivu atu alkansa objetívu igualdade jéneru nian. Atu konsolida no dezenvolve buat hirak ne'ebé hari'i ona ne'e presiza halo esforsu bo'ot hosi parte hotu, nedunik mak ho entuziazmu bo'ot iha oportunidade ida ne'e, hau hakarak agrade UNFPA nuudar ita nia parseiru importante no aliadu iha servisu ida ne'e.

Iha oportunidade ida ne'e mós, hau hakarak hato'o benvindu bá Representante foun UNFPA nian Sr. Pornchai Suchitta ne'ebé ohin loraun mai ona iha Timor-Leste. Sr. Pornchai nia mai lori nia esperiénsia durante tinan barak no hau hakarak simu ita bo'ot ho ita nia família ho laran haksolok no hau hein atu kontinua hametin parsería entre UNFPA ho Governu Timor-Leste ne'ebé hetan ona susesu no ho harmonia.

Atu ramata, hau hakarak agrade no dala ida tan hau fó hanoin bá ita bo'ot sira saida mak halibur ita hotu iha loraun ida ne'e liu husi fó agradesimentu bo'ot liu bá feto hotu-hotu iha Timor-Leste; ita bo'ot sira nia komitmentu, servisu maka'as no sakrifísiu maka hanesan selebrasaun ida real bá ohin loraun nian no mós ami fó valór bá ita bo'ot sira nia kontribuisaun bá dezenvolvimentu Timor-Leste ne'ebé sustentável.

Hau hakarak konvida ita bo'ot sira ne'ebé ohin loraun halibur iha ne'e atu ita hotu basa liman hodi rekoñese esforsu no servisu ne'ebé la hatene kolen no komitmentu ne'ebé bo'ot husi Feto Timor-Leste sira nian.

Hau hein katak ita bo'ot sira haksolok ho eventu no festa komemorasaun bá loraun ida ne'e. Dala ida tan hau hato'o obrigado bá ita bo'ot sira nia partisipasaun iha loraun ida ne'e.

Obrigada barak.